

Mbanjlaigyangh:

Aen Mbanj Iq Vuenyungz Diemzvan Laeng Lajdin Byaraiz

濠江屯：花山脚下甜蜜幸福的小山村

□ Luz Dezsanh / 陆铁山

Aen Miuhguenyaem lizsij gyaenanz, gorungz geq aiq miz saek bak bi, ranzvunzmbanj guh hawj bouxhek youq de cingxyax gyaqciq, sokruz gaeuqgeq caemcingx……Laeng lajdin Byaraiz Ningzmingz Yen, Cwnzgcungh Cin Yaudaz Cunh Mbanjlaigyangh hekyouz baebae dauqdaug, vunzmbanj hai nungzyahloz, gag guh dangznding, gunghyibinj bae baijgai daengj, mbanj cix aeu ranzgaeuq gaij guh dieg hawj bouxhek youq, ndwenngoengz gvaq ndaej hoenghhdw raeuh.

Gyawj geij bi neix, Ningzmingz hwnghat aen canjnieb lajmbanj lijyouz, gaijndei caeuq daezsang hwnghat gij sezsih giekdaj lajmbanj, hawj aenmbanj seuqcingh, caiq daiqdoengh vunzmbanj duetgungz baenzmiz. Daengx yienh gungh laebbaenz 18 aen dieg yienghbanj aeu lajmbanj lijyouz bae banggungz, daiqdoengh 1200 hoh ranzgungzhoj. Mbanjlaigyangh couh-dwg ndawde aen daibyauj ndeu.

Lajmbanj Lijyouz
Coengh Hwnghat

Mbanjlaigyangh youq giz cungsim diegbaeyouz vehbangxdat Byaraiz aen vwnzva yizcanj seiqgyaiq, dwg aen mbanj iq lij ce miz gij sibsug cienzdoengj yaemzrwg ndeu, Dahmingzgyangh sawdikdik hopngomx daengx mbanj. Doenghbaez, aenvih haeujok mbouj bienh, canjnieb mbouj lai, vunzmbanj gvaq ndaej gig gungzhoj, daengx mbanj 70 lai hoh ndawde couh miz 49 hoh dwg ranzgungzhoj.

Bi 2016, Dahcojgyangh bauq ndaej feihyiz le, Ningzmingz couh dawz Mbanjlaigyangh liedguh aen gih yienghbanj guh lajmbanj lijyouz, giz dieg yienghbanj aeu lajmbanj lijyouz bae banggungz ndeu. Mbanjlaigyangh daj baez hainduq couh dinghndei dajcauh “aen mbanj cienzdoengj swnghdai” miz vwnzva minzsug, geq-gangj gij fuengfap ciuhgeq guh dangznding daengj lai yiengh yenzsu, hwnghat lajmbanj lijyouz bae doidoengh daengx mbanj duetgungz. Mbanj de mboujduenh guh ndei aen gvanj lizsij ndaw mbanj, aen sokruz daengj; hwnghat hozcozse, cingjhab haifat gij fuengfap ciuhgeq guh dangz miz bak lai bi lizsij de, haivat doengh gij doxgaiq miz daegsaek vwnzva lijyouz; gaijndei yienghceij mbanj de, hawj aen mbanj bienqndaej engq gyaendei……

Bi 2017, aen gih lajmbanj lijyouz Laigyangh ndaej cauhaenz aen gih seiq singgaep guh lajmbanj lijyouz, yinx hekyouz daeuj guhcaemz, aen ngaenzbau vunzmbanj menhmenh moj hwnjdaeuq. Couh yienghneix, Yaudaz Cunh laeng bi daihngaih couh ndaej duet aen mauhgungz lo. Bi 2019, Mbanjlaigyangh ndaej senj haeuj buek

daihsam aen mbanj miz gij daegsaek siujsoq minzcuz Cungguk. Bi 2020, Yaudaz Cunh ndaej senj haeuj buek daihngaih aen mbanj youqgaenj guh lajmbanj lijyouz daengx guk.

Mbanj de lij hwnq le Beixnuengx Byaraiz, Gvangji, Gujlungz daengj 3 aen hozcozse, gonqlaeng haifat le 30 lai cungj huq, lumjbaenz dangznding, laeujoiq, laeujvaizsan, doengh gij gunghyibinj Byaraiz daengj, daiqdoengh 2000 lai boux vunz dieg de itheij demsou. Mbanjlaigyangh lij cujiz aen doih ndaek gyong Byaraiz, aen doih ndaek nyenz, aen doih eu fwen coux hek, aen doih danz gimz daengj 4 aen doih biujyienj vwnzyi lajmbanj, youq diegbaeyouz hawj hekyouz biujyienj cezmuq daengj, vunzlai camgya biujyienj de bi ndeu caemh canh ndaej saek di ngaenz ma boujdiep ndawranz, gyoengqvunz youq bakranz couh gwn hwnj le gij “haeuxlijyouz”.

Seizneix byaij haeuj Mbanjlaigyangh bae, gizgiz cungj ndaej raen gij gingjsaek ndei de, seiqhenz ngozbya heuswdswd, hopheux aen mbanj. Baihnaj ranz baihlaeng ranz cungj miz faexheu hop dwk, aen mbwn gvengqyauyau, hoengheiq cix ndei, gij gingjsaek doenghnaz lajmbanj caen gyaendei ha.

“Canjnieb Diemzvan”
Coi Demsou

Mbanjlaigyangh baengh “vehbangxdat Byaraiz” aen binjbaiz mizmingz neix, mboujduenh hwnghat gij canjnieb binjbaiz miz daegsaek minzsug, gij dangznding aeu vunz guh cienzdoengj caeuq doengh gij huq vunzmbanj gag guh de cungj gai ndaej gig ndei. Vunzmbanj mboujdan ndaej gwn “haeuxlijyouz”, lij byaij hwnj le “diuz roen baenzmiz diemzvan”. Gij canjnieb lajmbanj lijyouz daiqdoengh le vunzgungzhoj dieg de duetgungz baenzmiz coh siujgangh.

Mwh gooiq ndaej nyaeg seiz, danghnaeuz mwngz byaij haeuj Mbanjlaigyangh bae, doq ndaej nyouq gij heiqhom dangzoiq. Riengz gij heiqhom byaij bae, mwngz couh ndaej yawjraen vunzmbanj youq gwnz cauq gyanghongh gaq aen rek hung ndeu, ndawde cienz le baenz rek raemx, gij saek de lumj saek gyaujgwzli, neix cingq dwg vunzmbanj aeu gij fapdoj ciuhgeq cienz dangznding.

Dangznding dwg aeu gooiq ma guhbaenz. Vunzmbanj daj ndawreih nyaeg gij oij gag ndaem maranz, dawz gooiq nyaeg guh baenz mbaenq baenz mbaenq le gauj gij raemxoiq okdaeuq, caiq daih gij namh, gij nuenx ndaw raemxoiq deuz. Doeklaeng cij dawz raemxoiq raix haeuj ndaw rek hung bae, aeu feiz iq cienz baenz 5~6



▲ Vunzmbanj cingq guh dangznding.

Vangz Vunzvej ingi

diemjcung, baez cienz de aeu ndau-ndawq deih, hawj gij raemx ndaw raemxoiq baez di baez di fwi deuz, couh yienghneix, raemxdangz menhmenh couh bienq niu lo, sat le couh ndaej cienzqok dangzliu, raix okdaeuq, dangzliu caep le couh gag gietguh dangzco, neix couhhdw ciendanzsa lo. Youq ndawrek cienz ndaej yied nanz, gij saek ciendanzsa couh yied hoengzgeq. Cungj fapdoj ciuhgonq neix ndaej ce gij yingzyangj gooiq roengzdaeuq, aeu neix bae guh dangznding, gij dangz caemhcaiq miz cungj feihdauh lumj dangzremj daegbied nei.

Gij fapdoj guh dangz dwg gij dinfwngz Mbanjlaigyangh daj ciuhgonq cienz roengzdaeuq haenx, gij dangz ndei aenvih yienghceij mbouj aiq ndei, gai mbouj bae, ndigah gai mbouj ndaej gijmaz gyaq. Doeklaeng, Ningzmingz Yen yinx daeuq lauxbanj douzngaenz, laebbaenz le Bouxguhnaz Beixnuengx Byaraiz Ciennieb Hozcozse, youz hozcozse gyagoeng caeuq baucang dangznding, giyyiengh dangznding couh bienq ndei lo, gij dangjsw de caemh daezsang le haujai, hekyouz cij haemq maij cawx.

“Gij dangznding dou gai ndaej ndei, yienznaeuz lij dwg aeu fapdoj guhbaenz, hoeng baucang gaijndei lo, mwh guh dangz cix engq cingsaeq, couh guh’ok gij dangz engq gyaqciq daeuq, cungj dangznding neix ndaej cuengq nanz, bouxhek caemh engq maij cawx.” Boux lijswcangj hozcozse Vangz Siujyinh naeuz, neix caeuq vunzmbanj baenz benq baenz benq gag guh bae gai mbouj doengz.

Seizneix, aen hozcozse mboujdan guh’ok lai cungj feihdauh dangznding lumj hingdoj, lwgraz duhnamm, hwdauz lwgraz, vagut daengj, lij ciuq gij doz vehbangxdat guh’ok buek dangznding “Vuongz Byaraiz”, gig miz gij vwnzva daegsaek Byaraiz. Lingh-

vaih, hozcozse caiq dajcauh aen binjbaiz dangznding, caemh youq gwnz muengx guh gaicawx, gij dangznding gyoengqde couh yienghneix gai daengz daengx guk gak dieg bae.

Gij dangznding mbanj de dwg “bauj”, daiq gij fugfauz cienz dangz cienz ok de, vunzmbanj cungj aeu bae ngauz laeujoiq, cungj laeuj neix aeu fugfauz dangzoiq ngauz baenz, feihdauh gig ndei, gwn hwnjdaeuq cix diemz cix nyinh, giyheiq cix homfwtfw, de caemh bienqbaenz cungj “dwzcanj rangdiemz” Mbanjlaigyangh.

Gij hong aeu fapdoj guh dangz “diemzvan” cienzdoengj neix ce miz gij gaiqrox caeuq lwedhanh vunzmbanj, hawj vunzlai ndaej demsou baenzmiz. Mbanj de lij caengz duetgungz seiz, hozcozse daiqdoengh le 100 lai hoh ranzgungzhoj guh dangznding, ngauz laeujoiq, bi ndeu gai ndaej 11 fanh goenggaen dangz doxhwnj, ndaej ok 3 fanh goenggaen laeujoiq, canh le aiq miz 230 fanh maenz, moix hoh ranzgungzhoj youq ndawde guhhong haenx bi ndeu cungj ndaej souhaeuq 3 fanh maenz doxbae.

Seizneix, Mbanjlaigyangh caiq mbouj dwg aen mbanj doenghbaez caemrwg lo. Byaij haeuj ndaw mbanj, rumzliengz ci daeuq, gofaex mwncup, gig miz gij feihdauh doenghbaez, mbouj miz gij nauhyied hawsingz, vunz ndaej caenhsim gvaq hwnj gij saedceij soengse de. Hekyouz youq gizneix mboujdan ndaej daejniemh gij minzsug biujyienj lumjbaenz dingq fwen Bouxcuengh, yawj ndaek aen-nyenz, ngonz ndaek gyong Byaraiz, gwn laeujdaizraez, dingq danz gimz daengj, lij ndaej daejniemh baenzlawz guh dangznding, ngauz laeujoiq, daem ceiz daengj, gij minzsug minzfungh Byaraiz cinghseuq boeksaed, gijgwn Bouxcuengh feih raeuh, hawj vunz angq dwk mbouj sij maranz bae.

(Mbawdoz daj Sinhvazvangj aeu)